

**Kawasan Batu Caves Akan Dipertahankan – Najib
Bernama
13 November, 2012**

KUALA LUMPUR, 13 Nov (Bernama) -- Perdana Menteri Datuk Seri Najib Tun Razak Selasa memberi jaminan bahawa kawasan Batu Caves akan dipertahankan daripada sebarang kerosakan atau ancaman yang boleh menjejaskannya.

Beliau berkata jika Barisan Nasional (BN) berjaya menawan semula Selangor pada pilihan raya umum akan datang, ia akan membatalkan cadangan projek pembangunan kondominium 29 tingkat di kawasan itu selain mencadangkan supaya Batu Caves diisytihar sebagai tapak warisan dunia.

Najib menarik perhatian Batu Caves begitu dekat di hati penganut agama Hindu dari dalam dan luar negara serta disanjung sebagai tempat yang tinggi kedudukannya di sisi mereka.

"Kita tidak mahu pembangunan di kawasan ini mengancam masa depan kompleks Batu Caves. Pengakuan yang saya buat ini, sepertimana yang kita tahu (berdasarkan) kerajaan BN adalah kerajaan 'Janji Ditepati'," katanya ketika berucap pada majlis Rumah Terbuka Deepavali anjuran MIC di perkarangan kompleks Batu Caves di sini.

Projek kondominium yang dirancang dibina berhampiran bukit batu kapur itu mendapat tentangan pelbagai pihak kerana dilihat akan menjejaskan kawasan dan penduduk di sekitarnya.

Mengulas lanjut, Najib berkata cadangan menjadikan Batu Caves sebagai tapak warisan dunia perlu dibawa ke Unesco (Pertubuhan Pendidikan, Saintifik, dan Kebudayaan Pertubuhan Bangsa-Bangsa Bersatu) selepas tempoh Malaysia menjadi anggota Suruhanjaya Warisan Dunia tamat pada 2015.

Usaha itu akan dilakukan melalui Kementerian Penerangan Komunikasi dan Kebudayaan.

"Kita tidak boleh buat permohonan buat masa ini kerana boleh berlaku 'conflict of interest' (konflik kepentingan). Tempoh kita akan berakhir pada 2015, dan pada masa itu kita akan mengemukakan (permohonan) secara rasmi supaya kompleks Batu Caves diisytihar Unesco sebagai tapak warisan dunia," katanya.

Dalam ucapannya, Najib turut mengumumkan cuti am Deepavali akan mencakupi Wilayah Persekutuan Labuan.

"Walaupun Labuan tidak mempunyai ramai penganut Hindu tetapi...kerana Labuan ialah sebahagian dari Wilayah Persekutuan, maka mereka juga layak menikmati hari Deepavali sebagai cuti am," kata Najib.

Beliau menyifatkan rumah terbuka Deepavali anjuran MIC yang berlangsung di Batu Caves buat kali kedua itu sebagai amat meriah dan pengunjug yang hadir menyambut perayaan itu dilihat mencerminkan semangat 1Malaysia.

"Semangat 1Malaysia yang didukung oleh rasa saling menghormati antara pelbagai kaum, agama dan budaya yang dipupuk selama ini merupakan tunjang negara kita," tegas beliau sambil mengucapkan tahniah kepada kepimpinan MIC atas penganjuran acara itu.

Najib kemudiannya menghadiri rumah terbuka Deepavali anjuran Gabungan Dewan Perniagaan dan Perindustrian India Malaysia(MAICCI) di Rumah Puspanita di sini dan ketibaan beliau disambut Presiden MAICCI Datuk K K Eswaran.

Turut hadir Ketua Setiausaha Negara Datuk Seri Dr Ali Hamsa, Raja Nong Chik, Liow, Koh dan Ketua Wanita Umno Datuk Seri Shahrizat Abdul Jalil serta anak Najib, Nor Ashman.

Sebelum beredar dari majlis itu yang tetamunya termasuk anak yatim dan kanak-kanak kurang kemampuan, kira-kira 45 minit kemudian, Najib memotong kek Deepavali setinggi tiga tingkat dan menerima kalungan bunga daripada Eswaran.

Sementara itu, Eswaran menggesa masyarakat India memberikan sokongan padu terhadap kerajaan dan perdana menteri, dan menegaskan pentingnya mengamalkan konsep 1Malaysia.

Beliau berkata di bawah kepimpinan Najib, kerajaan menghulurkan bantuan yang membolehkan lebih ramai kaum India menceburi sektor perniagaan termasuk perusahaan kecil dan sederhana (PKS).

"Masyarakat perniagaan kaum India tidak lagi boleh merungut dan perlu memberikan sokongan padu kepada Datuk Seri Najib kerana beliau amat prihatin terhadap kita," katanya sambil memberikan contoh peruntukan khas RM180 juta untuk usahawan India.

Najib kemudiannya menghadiri majlis sambutan Deepavali Parti Progresif Penduduk (PPP) Wilayah Persekutuan di Jalan Sentul di sini yang turut dihadiri Presiden PPP Datuk M Kayveas, Pengerusi PPP Wilayah Persekutuan Datuk A Chandrakumanan dan Naib Presiden kanan parti Datuk Maglin Dennis D'Cruz serta beberapa anggota Kabinet dan ahli politik.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=708941>